

Aalisarnermik piniarnermillu inuussutissarsiutillit inuussutissarsiornerannik siuarsaanermut inatsisip (ESU) allanngortinneqarsinnaanera pillugu - taassumalu kingunissai pillugit - Naalakkersuisut misissuinissaannik Inatsisartut aalajangiiffigisassaattut siunnersuut, taamaalilluni siunissami inuussutissarsiutigalugu umiatsiaaqqap pissarsiarinerata nalingata 60 %-ianik inuussutissarsiornermi siuarsaanissaq pillugu taarsigassarsiisoqarsinnaanngorlugu. Misissuinerup inernera kingusinnerpaamik aggustip aallaqqaataani 2016-imi Inatsisartunut agguanneqassaaq.
(Inatsisartunut ilaasortaq Nikolaj Jeremiassen, Siumut)

pillugu

Aalisarnermut, Piniarnermut Nunalerinermullu Ataatsimiititaliap

ISUMALIUTISSIISSUTAA

Siunnersuutip aappassaaneerneqarnerani saqqummiunneqartoq

Ataatsimiititaliap suliarinninnermini kingullermik ukuninnga inuttaqarpoq:

Inatsisartunut ilaasortaq Nikolaj Jeremiassen, Siumut, siulittaasoq
Inatsisartunut ilaasortaq Ane Hansen, Inuit Ataqtigiit, siulittaasup tullia
Inatsisartunut ilaasortaq Michael Rosing, Demokraatit
Inatsisartunut ilaasortaq Jens Immanuelson, Siumut
Inatsisartunut ilaasortaq Siverth K. Heilmann, Atassut
Inatsisartunut ilaasortaq Aqqaluaq B. Egede, Inuit Ataqtigiit
Inatsisartunut ilaasortaq Hans Enoksen, Partii Naleraq

UKA 2015-imi ull. 20. oktober 2015-imi siullermeerinerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Aalisarnermik piniarnermillu inuussutissarsiutillit inuussutissarsiornerannik siuarsaanermut inatsisip (ESU) allanngortinneqarsinnaanera pillugu - taassumalu kingunissai pillugit - Naalakkersuisut misissuinissamik peqquneqarnissaat siunnersuummi siunertarineqarpoq, taamaalilluni siunissami inuussutissarsiutigalugu umiatsiaaqqap pissarsiarinerani nalingata 60 %-ianik inuussutissarsiornermi siuarsaanissaq pillugu taarsigassarsiisoqarsinnaanngorlugu. Siunnersuut akuerineqassappat misissuinerup inernera kingusinnerpaamik aggustip aallaqqaataani 2016-imi Inatsisartunut agguanneqartussaassaaq.

Siunnersuutip Inatsisartuni siullermeerneqarnera

Siunnersuut siullermeerneqarmat Siumumit Atassumillu taparserneqarpoq, akerlianilli siunnersuut itigartinneqassasoq Demokraatinit Inuit Ataqatigiinnillu inassutigineqarluni. Partii Naleqqap siunnersuut soqutigalugu oqaatigaa, sukumiinerusumilli misissuisoqarnissaa siunertaralugu siunnersuutip ataatsimiititaliamit suliarineqartussanngorlugu innersuunneqarnissaa kissaatigalugu.

Angallatinik pissarsinissamut tapiissuteqartarnermik aqqissuussinerup siunissami allanngortinneqarnissaanut periarfissanik Aalisarnermut, Piniarnermut Nunalerinermullu Naalackersuisoqarfik misissuissasoq aammalu siunnersuut una aalisartut aningaasaqarnikkut pissakinnerusut pilliutigalugit aalisartunut aningaasaliinissamik periarfissaqareersunut iluaqutaassagunartoq Naalackersuisut oqaatigaa. Taamaattumik siunnersuut itigartinneqartussat inassutigineqarpoq.

Tamanna tunngavigalugu siunnersuut Aalisarnermut, Piniarnermut Nunalerinermullu Ataatsimiititaliamut suliarineqartussanngorlugu innersuunneqarpoq.

Ataatsimiititaliap siunnersuummik suliarinninnera

Ilaatigut inuussutissarsiutigalugu umiatsiaaqqanik pissarsinissaq eqqarsaatigalugu aningaasalersuinissamut periarfissanik misissuineq aqqutigalugu aalisarnermi aningaasaqarneq nukittorsarneqassasoq politikikkut partiinit – aammalu Naalackersuisunit – assut taparserneqartoq ataatsimiititaliap paasivaa.

Siunnersuummut matumunnga aamma tunngatillugu taamaagunarpoq. Tassunga atatillugu ataatsimiititaliap paasinninnera malillugu aalisartut ajornerusumik inissimalernissaat siunnersuuteqartup siunnersuuteqarnermigut siunertarisimanngilaa, taamaattorli taasissutissaq maanna ilusimisut iluseqarluni paatsoorneqarsinnaasoq ataatsimiititaliaq isumaqarpoq.

Inuussutissarsiutinik siuarsaanagermut aqqissuussinermik – Naalackersuisut oqarnerattut – tapiissutaajunnaartillugu taarsigassarsiannngortillugu allannguinerup taamaalilluni kingunerissavaa umiatsiaararsorlutik aalisartut annertuumik akiitsoqalernerat, tassami taakku umiatsiaaqqap tamakkiisumik nalinga (100 pct.) siunissami namminneq aningaasalersortussanngussammassuk, akerlianik maleruagassat atuuttut malillugit umiatsiaararsorlutik aalisartut ataasiakkaat tapiissutinik qinnuteqarnissamut periarfissaqarput, taamaalillunilu nammineq aningaasalersugassat qinnuteqartup aalajangersimasumik najugaqarfigisaa apeqqutaalluni 16 aamma 25 pct.-imut annikillisinneqarlutik.

Naak taasissutissap qulequtaata taama oqaasertalersorneqarsimagaluartoq taarsigassarsianut aqqissuussinermut siunnersuutip maanna tapiissutinut aqqissuussinermut *taartaanani tapertaanissaa* siunertarineqartoq ataatsimiititaliarli isumaqarpoq, taamaalilluni pissarsiasap nalinganit nammineq akiligassap 60 pct.-ia siunissami pisortanit taarsigassarsiat aqqutigalugit

aningaasalersorneqarsinnaaqullugu.

Tamanna naapertorlugu ataatsimiititaliami amerlanerussuteqartut allannguutissatut siunnersuut imaattoq matumuuna saqqummiuppaat:

”Aalisarnermik piniarnermillu inuussutissarsiutillit inuussutissarsiornerannik siuarsaanermut inatsisip (ESU) allanngortinneqarsinnaanera pillugu - taassumalu kingunissai pillugit - Naalackersuisut misissueqqullugit peqquneqarnissaannik Inatsisartut aalajangiiffigisassaattut siunnersuut, taamaalilluni siunissami inuussutissarsiutigalugu umiatsiaaqqap pissarsiarinerata nalingata *nammineq aningaasalersorneqartussap* 60 %-ianik inuussutissarsiornermi siuarsaanissamut taarsigassarsisoqarsinnaanngorlugu. Misissuinerup inenera kingusinnerpaamik aggustip aallaqqaataani 2016-imi Inatsisartunut agguanneqassaaq”

Tassunga atatillugu ataatsimiititaliami amerlanerussuteqartunit maluginiarneqarpoq siunnersuummi taamaallaat pineqartoq misissuineq – taamaalillunilu siunnersuutip malitsigisaanik taarsigassarsianut aaqqissuussineq taaneqartoq atuutsinneqalissanersoq atuutsinneqalissannginnersorluunniit inaarutaasumik isummerfigineqanngitsaq. Misissuinikkulli maleruagassanik atuuttunik allannguinnissamik periarfissaq tamatumalu kingunerisassai paasinarsisiinnassavai, taamaaliornikkullu siunissami aalajangiisoqassagalarpat tamatuma tunngavissaqarluarluni pinissaa peqataaqataaffigalugu.

Aammattaaq inuussutissarsiutinik siuarsaanermut aaqqissuussinerup nalilerneqarnissaa Aalisarnermut, Piniarnermut Nunalerinermullu Naalackersuisoqarfiup *nammineq ingerlannialersaareeraa* Naalackersuisut siullermeerinermi oqaatigigaat ataatsimiititaliami amerlanerussuteqartunit maluginiarneqarpoq – naak tapiissutinut aaqqissuussineq kisimi aallaavigineqaraluartoq (-gunartaq).

Tamatumunnga atatillugu siunnersuuteqartup misissuineq siunnersuutigisaa Aalisarnermut, Piniarnermut Nunalerinermullu Naalackersuisoqarfiup naliliinissamik ilimasaarutaanut ilanngunneqaralarpat tamanna naleqquttuussasoq ataatsimiititaliami amerlanerussuteqartut isumaqarput, taamaalilluni misissuineramik ataqatigiissumik 2016-imi augustimi saqqummiussisoqarsinnaaqullugu.

Tassa imaappoq Qaanaami, Ammassalimmi Ittoqqortoormiinilu tapiissuteqartarnermik maanna aaqqissuussinerup (84/16-*imik periuseq*) nunap immikkoortuinut allanut atuuttussanngorlugu annertusarneqarnissaanut periarfissaq pillugu isummernissap saniatigut inuussutissarsiutigalugu umiatsiaaqqamik pissarsinermut atatillugu pisortat taarsigassarsianut aaqqissuussinerannik atuutsitsilernissamut periarfissaq pillugu oqaaseqaateqaqqullugu Naalackersuisoqarfik peqquneqassasoq.

Tamatuma saniatigut inuussutissarsiutinik siuarsaanermut aaqqissuussineq atorlugu umiatsiaararsorlutik aalisartut nalinginnaasumik atugassarititaasut malillugit niuernerminalinginnaasumik akit atorlugit aningaasalersuinissaminnik ajornartorsiuteqartussat – taamaalillutillu aamma inuussutissarsiutigalugu umiatsiaaqqamik nutaamik pissarsinissamut aningaasalersuinissaminnut ajornartorsiuteqartussat pitsaanerpaamik atugassaqartinneqarnissaat ataatsimut isigalugu pingaaruteqartoq ataatsimiititaliami amerlanerussuteqartut isumaqarput.

Tunngavissat pigineqartut tunngavigalugit siunnersuummut annertunerusumik oqaaseqaateqarnissaminut ataatsimiititaliaq tunngavissaqarsorinngilaq.

Siunnersuutip aningaasaqarnikkut kingunerisassai

Aalajangiiffigisassatut siunnersuummi oqaatigineqarpoq siunnersuut akuerineqarpat tamanna pisortanut aningaasaqarnikkut taamaallaat killilimmik kinguneqassasoq ukiup sisamararterutaani ukiullu affaata missaani sulisumut naapertuuttumik (125.-250.000 kr.). Naalackersuisut taama naliliineq akerlilinngilaat.

Tamatumani aningaasaqarnikkut allaffissornikkulluunniit pisortanut kingunerisassat annertusinerannik ataatsimiititaliap allannguutissatut siunnersuutaata nassataqarnissaa ilimagineqanngilaq, tassami misissuinerup siunertaanik erseqqissaaneq pingaarnertut pineqarmat. Aammattaaq Naalackersuisut inuussutissarsiutinik siuarsaanermut aaqqissuussinermik naliliinissamik ilimasaarutaannut atatillugu misissuinerup ingerlanneqarsinnaanissaa naatsorsuutigineqarpoq aammalu Aalisarnermut, Piniarnermut Nunalerinermullu Naalackersuisoqarfiup tamatumunnga sulisussanik aningaasanillu immikkoortitseresimanissaa naatsorsuutigineqartariaqarluni.

Naalackersuisut allatut isiginninnissamut tunngavissaqarsorigunik qinnuigineqarput siunnersuutip aappassaneerpeqarnerani tamanna paasissutissiissutigeqqullugu.

Ataatsimiititaliap i nassuteqaatai

Ataatsimiititaliami amerlanerussuteqartut Siumup, Inuit Ataqtigiit, Atassutip aamma Partii Naleqqap **allannguutissatut siunnersuut** matuma kinguliani allassimasoq **akuerineqassasoq inassutigaat:**

”Aalisarnermik piniarnermillu inuussutissarsiutillit inuussutissarsiornerannik siuarsaanermut inatsisip (ESU) allanngortinneqarsinnaanera pillugu - taassumalu kingunissai pillugit - Naalackersuisut misissueqqullugit peqquneqarnissaannik Inatsisartut aalajangiiffigisassaattut siunnersuut, taamaalilluni siunissami inuussutissarsiutigalugu umiatsiaaqqap pissarsiarinerata nalingata nammineq aningaasalersorneqartussap 60 %-ianik inuussutissarsiornermi siuarsaanissamut

taarsigassarsisoqarsinnaangorlugu. Misissuinerup inenera kingusinnerpaamik aggustip aallaqqaataani 2016-imi Inatsisartunut agguaanneqassaaq”

Ikinnerussuteqartut Demokraatit **siunnersuut** **kiisalu** **ataatsimiititaliami**
amerlanerussuteqartut **allannguutissatut** **siunnersuutaat** siuliani taaneqartoq
itigartinneqassasut inassutigaaat.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.

Nikolaj Jeremiassen
Siulittaasoq

Ane Hansen
Siulittaasup tullia

Michael Rosing

Jens Immanuelson

Siverth K. Heilmann

Aqqaluaq B. Egede

Hans Enoksen